

## DIRULAGUNTZAK ERAIKUNTZEN IKUSKAPEN TEKNIKOAREN (EIT) ONDORIOZKO OBRAK EGITEKO ETA ERAGINKORTASUN ENERGETIKOA HOBETZEKO JARDUKETAK GAUZATZEKO

### I. KAPITULUA XEDAPEN OROKORRAK

#### ***1. artikulua. Xedea***

Deialdi honen helburua diru-laguntzak emateko modua arautzea da, honako jarduketa-eremu hauetarako:

- Eraikinen ikuskapen teknikoaren (aurrerantzean, EIT) ondoriozko obrak egitea
- Eraginkortasun energetikoa hobetzeko jarduketak gauzatzea lehendik dauden bizitegi eraikinetan, etxebizitzetan, eta bizitegi eraikinetan kokatutako establezimendu komertzialetan.

#### ***2. artikulua. Organo eskuduna***

Oinarri hauek onartzeko eskumena duen organoa Tokiko Gobernu Batzarra da, Alkateak 2019ko irailaren 10an emandako eskuordetze Dekretuaren arabera.

#### ***3. artikulua. Aurrekontuko diru hornidura***

Deialdi honen helburuak lortzeko 100.000 euroko diru kopurua aurreikusi da aurrekontuaren honako partida honetan: 02.480.01.151.10 (6328) «Dirulag. Etxebizitza».

3.1 EITaren ondoriozko obrak egitea  
60.000

3.2 Eraginkortasun energetikoa hobetzeko jarduketak gauzatzea  
40.000

#### ***4. artikulua. Interpretazioa***

Diru-laguntza emateko ardura duen organo berari dagokio oinarri hauen interpretazioaren harira sor daitekeen edozein zalantzari buruz erabakitzea.

Oinarri hauetan aurreikusi ez den guztian Diru-laguntzei buruzko azaroaren 17ko 38/2003 Lege Orokorra eta hura garatzen duen Araudia, uztailaren 21eko 887/2006 Errege Dekretuak onartua, aplikatuko dira.

#### ***5. artikulua. Publizitatea***

Deialdia, oinarri arautzaileak eta haien babesean emandako diru-laguntzak udalaren web orrian [www.hernani.eus](http://www.hernani.eus) eta Gipuzkoako Aldizkari ofizialean argitaratuko dira, Diru-laguntzei buruzko 38/2003 Lege Orokorraren 9 artikuluekin bat etorritik.

#### **6. artikulua. Diruz lagun daitezkeen jarduerak**

Deialdi honen ondorioetarako, puntu honetan sartuta dauden jarduketa guztiak izango dira diruz lagungarriak, betiere 2021 urtean zehar burutu badira, eta udalaren lizentzia/baimena baldin badute, hala dagokienean.

Nolanahi ere, diruz lagungarri diren jarduketak Hernaniko udalerrian kokatuta dauden eraikin edo instalazioetarako izango dira.

**6.1 EITaren ondoriozko obrak egiteari** dagokionean eta betiere haiek EITan jasotakoak badira, diruz lagungarriak izango dira hauexek:

- a) Beharrezko dokumentazio teknikoa egiteko eta zuzendaritza fakultatiboa burutzeko, tekniko eskudunen ordainsariak.
- b) Ikusketa Diktamenean zehaztutako esku-hartzeak gauzatzen dituzten obrak, eta betiere obra horiek udal baimena badute, diru-laguntzak lortu ditzaketen lanak hauek dira:
  - Eraikinaren EITan “berehala egin beharreko”, “oso presazko” edo “presazko” obra gisa tipifikatu diren jarduerak
  - EITaren arabera epe ertainerako programatu diren jarduketak, baldin eta eraikuntza osagaien bizitza erabilgarria modu adierazgarrian murrizten duten prozesuen arriskuak kendu edo murrizten badituzte.

**6.2 Eraginkortasun energetikoa hobetzeko jarduketak gauzatzeari** dagokionean, diruz lagungarriak izango dira lehendik dauden bizitegi erabilerako eraikinetan egindako berritze eta birgaitze jarduketak. Ez dira diruz lagunduko obra berriak.

Jarduketa horien eremua izan daiteke eraikin osoa, edo ohiko okupazioko banakako etxebizitza, edo lokal komertziala.

Jarduketaren eremua ezingo da izan soilik ez-bizigarri den espazioa. Esparru ez-bizigarritzat hartuko dira pertsonen etengabeko erabilerara bideratuta ez daudenak, edo haiek okupatzeko osasungarritasun baldintza egoki batzuk soilik eskatzen badira, okupazio hori aldizkakoa edo salbuespenezkoa delako eta egonaldi-denbora laburra izango delako. Kategoria horretan esplizituki sartzen dira esparru ez-bizigarri gisa: trastelekuak, ganbera teknikoak eta egokitu gabeko ganberak eta haien eremu komunak.

Diruz lagungarriak izango dira Hernaniko Udalerriko Energia Jasangarriaren Plangintzako Ekintza Planean jasotakoarekin lerrokatutako ondorengo jarduketak:

- a) **Bizitegi erabilerako eraikinaren inguratzailearen hobekuntza:** Eraikinaren inguratzaile termikoa hobetzea fatxadan, estalkian, babestu gabeko beheko solairuetan edo inguratzaile horren edozein paramentutan, baita gailu bioklimatikoak eta itzaleztatzeak instalatzea eta arotzeria ordezkatzeko ere. Inguratzailearen hobekuntzaren bidez lortu beharko da eraikinaren berokuntzaren urteko energia-eskari globala gutxienez % 30 edo letra bat murriztea jarduketa horien aurretiko energia-ziurtapenari dagokionez.

**b) Bizitegi erabilerako eraikinean bero-sistema zentralizatua ezartzea:** Galdara individualen ordez bero-sistema zentralizatuak jartzea. Galdara zentralizatuaren errendimendu izendatua %90 edo handiago izango da.

Atal honetatik kanpo geratzen da berriztagarrietan oinarritutako sistema zentralizatu bat instalatzea. Hori hurrengo atalean sartu da.

**c) Bizitegi erabilerako eraikinean elkarbanatutako instalazio berriztagarriak ezartzea:** energia berriztagarrien ekipoak instalatzea, eraikinaren ohiko energia-kontsumoa murrizteko. Ondorengo baldintzak bete beharko dira:

- Ezin izango dira laguntza-programa honetara bildu Eraikuntzaren Kode Teknikoak (EKT) ezarritako exekuziopean dauden instalazioak. Laguntza jaso ahal izango da instalazioak EKTak ezarritakotik gora handitzeko bada.
- Eguzki instalazio termikoen kasuan, temperatura baxuko sistemak aurreikusten dira fluidoak berotzeko, eguzki erradiazioaren kaptazioa kolektore lauen, CPCen edo hutseko hodien bidez eginda. Eguzki kaptadoreen galera koefiziente globala  $9 \text{ W}/(\text{m}^2 \text{ } ^\circ\text{C})$  baino baxuagoa izan beharko du.
- Biomasaren energia-aprobetxamenduen kasuan, biomasa zentralizatua erabiliko duten galdara-gelak aurreikusten dira. Instalazio horietako galdarek % 90eko edo gehiagoko errendimendu nominala izan beharko dute.
- Argindarra ekoizteko instalazio fotovoltaiko, eoliko eta minihidraulikoen kasuan, diruz lagungarri izango dira 100 kW arteko instalatutako benetako potentzia izendatua dutenak. Elektrizitatea metatzeko bateriak diruz lagungarriak izango dira soilik instalazioa saretik isolatuta dagoenean (alegia, sare elektrikora konektatuta ez dauden instalazioetan). Bateria horiek litio-ioi teknologikoak izango dira derrigor.
- Bestelako instalazioen kasuan edo konbinazioen kasuan, irtenbidearen balio teknikoa, egokitasuna eta errendimendua justifikatu beharko dira, gainerako aukerei eskatzen zaienaren ildotik.

**d) Etxebizitzan edo establezimendu komertzialean kanpo-arotzeria beiratzatua berritzea** (leihoak eta leiho-ateak). Jarriko den kanpoaldeko arotzeria kristaldun berriak honako ezaugarri hauek izango ditu:

- EB marka eduki beharko du
- Kristal bikoitzak izango dituzte,  $1,40 \text{ W}/\text{m}^2 \text{ K}$  -ko edo txikiagoko transmitantzia termikoarekin ( $U_g$ ) eta gutxienez  $30 \text{ dB(A)}$ -koa izango da aireko zaratarekiko isolamendua.
- Berritutako arotzeria guztia etxebizitzaren kanpoaldeko itxituretan egongo da, edo kanpoaldearekin kontaktuan dagoen espazio ez-bizigarriara ematen duen barruko itxituretan. Ez da barne sartzen kanpoaldearekin kontaktuan ez dagoen espazio ez-bizigarriara ematen duen arotzeria ordezkatzea, nahiz espazio hori ez egon berotua. Horren harira, adibidez, diruz-lagungarria izango da irekita dagoen patiora ematen duen etxebizitzaren arotzeria ordezkatzea; aldiz, ez da diruz lagungarria izango eraikinaren barruko eskaileratako leihoen ordezkapena.

**e) Etxebizitzan edo establezimendu komertzialean galdara zaharrak ordezkatzeari:** galdara zaharren ordez errendimendu handiko kondentsazio-galdara berriak jartzea, energia-eraginkortasun handiko ekipotzat hartzen direnak. Instalazioek Industria, Merkataritza eta Turismo sailburuak 2008ko uztailaren 22an emandako Aginduan eta gainerako arauetan ezarritakoa bete beharko dute. Agindu horren bidez Eraikinetako Instalazio Termikoen Erregelamenduari (EITE) buruzko arauak eman ziren.

Ordezkatzutako ekipoa suntsitu egin beharko da.

Ez dira diruz lagunduko murrizketa hauetakoren bat betetzen ez duten berritzeak:

- 70 kW-tik gorako potentzia
- Instalatu beharreko ekipoa ez du lehendik dagoen ekipamendu bat ordezkatzeko, edo instalazio kolektibo baten deszentralizaziotik dator.
- Ekipoa berria ez da kondentsazio-teknologiakoa.
- Ordezkatutako galdara kondentsazio-teknologiakoa da

**f) Etxebizitza edo establezimendu komertziala hornitzeko instalazio berriztagarriak ezartzea:** energia berriztagarrien ekipoa instalatzea, etxebizitzaren edo merkataritza lokalaren ohiko energia-kontsumoa murrizteko. Ondorengo baldintzak bete beharko dira:

- Ezin izango dira laguntza-programa honetara bildu Eraikuntzaren Kode Teknikoak (EKT) ezarritako exekuziopean dauden instalazioak. Laguntza jaso ahal izango da instalazioak EKTak ezarritakotik gora handitzeko bada.
- Eguzki instalazio termikoen kasuan, tenperatura baxuko sistemak aurreikusten dira fluidoak berotzeko, eguzki erradiazioaren kaptazioa kolektore lauen, CPCen edo hutseko hodian bidez eginda. Eguzki kaptadoreen galera koefiziente globala 9 W(m<sup>2</sup> °C) baino baxuagoa izan beharko du.
- Biomazaren energia-aprobetxamenduaren kasuan, biomasa indibiduala erabiliko duten galdara-gelak aurreikusten dira. Instalazio horietako galdarek % 90eko edo gehiagoko errendimendu nominala izan beharko dute.
- Argindarra ekoizteko instalazio fotovoltaiko, eoliko eta minihidraulikoen kasuan, diruz lagungarri izango dira 10 kW arteko instalatutako benetako potentzia izendatua dutenak. Elektrizitatea metatzeko bateriak diruz lagungarriak izango dira soilik instalazioa saretik isolatuta dagoenean (alegia, sare elektrikorara konektatuta ez dauden instalazioetan). Bateria horiek litio-ioi teknologiakoak izango dira derrigor.
- Bestelako instalazioen kasuan edo konbinazioen kasuan, irtenbidearen balio teknikoa, egokitasuna eta errendimendua justifikatu beharko dira, gainerako aukerei eskatzen zaienaren ildotik.

## *7. artikulua. Diru-laguntzen gehienezko zenbatekoa eta diruz lagunduko diren gastuak*

7.1 EITaren ondoriozko obrak egiteko diru-laguntza ez itzultzekoa izango da, diruz lagun daitekeen kostuaren %50koa. Diru-laguntzak ezingo du gainditu, eskatzaile bakoitzeko, eraikinaren etxebizitza kopurua eta 2.000 euro biderkatuta kalkulaturako zenbatekoa.

7.2 Eraginkortasun energetikoa hobetzeko jarduketak gauzatzeko diru-laguntza ez itzultzekoa izango da, diruz lagun daitekeen kostuaren %35koa. Gainera:

- 6.2 artikuluko a), b) eta c) ataletako jarduketan kasuan, diru-laguntzak ezingo du gainditu, eskatzaile bakoitzeko, eraikinaren etxebizitza kopurua eta 2.000 euro biderkatuta kalkulaturako zenbatekoa.
- 6.2 artikuluko d), e) eta f) ataletako jarduketan kasuan, diru-laguntza, gehienez ere, 2.000 €-koa izango da eskatzaile bakoitzeko.

7.3 Jarduketa berak diru-laguntza jasotzen badu EITaren ondoriozko obra delako ez ezik baita eraginkortasun energetikoa hobetzeko jarduketa delako ere, guztira jasotako diru-laguntza ez da diruz lagun daitekeen kostuaren %75koa baino handiagoa izango.

7.4 Nolanahi ere, onuradun bakoitzak jasotako diru-laguntza ez da 50.000 € baino handiagoa izango.

7.5 Diruz lagun daitezkeen gastuaren barne sartzen dira:

- Materialaren kostua
- Obra edota instalazioetatik eratorritako kostuak (igeltserotza, iturgintza, etab.)
- Dokumentazio teknikoaren prestaketari lotutako ingeniari-tza edo arkitektura zerbitzuen kostuak, baita zuzendaritza zerbitzuena ere

Era berean, ez dira diruz laguntzeko moduko kostutzat hartuko:

- Erositako ondasunengatik edo fakturatutako zerbitzuengatik ordaindutako BEZ eta, oro har, beste edozein zerga.
- Oro har, argi eta garbi definituta ez dauden gastuak.
- Ez dutenak helburu zuzen oinarri hauen xedea betetzea. Hori horrela, jarduketaren baitan egiten badira, hurrenez hurren, EITaren ondoriozkoak ez diren lanak edo energia eraginkortasunaren hobekuntzari zuzenean lotuta ez dauden esku-hartzeak, horiek ez dira diruz lagungarriak izango.

7.6 Jarduketa arotzeria aldatzea denean:

- Diruz lagungarriak izango dira leihoen kostuak oro har eta haien instalazioaren kostua, baita eraikitako aurrealdearen irudi koherentea zaintzeko derrigorrezkoak diren elementuak ere.
- Ez da diruz lagungarria izango:

- Arotzeria beiratzatuaren osagaien bat konpondu edo ordezkatzea.
- Eraikin osoko inguratzailea hobetzeko jarduketa integratuaren baitan ez bada, kanpora ematen duten tokiak (balkoiak, terrazak, etxe-eguterak eta/edo esekitokiak) ixteko jartzen den kanpoaldeko arotzeria beiratzatua
- Kontraleihoak edo antzeko osagaiak jartzea eraikinaren aurre aldearen balio estetikoaren arabera justifikatu gabe badaude (pertsiana motorrak, eltxo-sareak, esekitokiak, barandak...)

7.7 Jarduketa bizitegi erabilerako eraikinean bero-sistema zentralizatua ezartzea denean:

- Diruz lagungarriak izango dira ekipoen eta instalazioaren kostuak, hauek barne: beroa sortzeko ekipoa, energia kontrolatzeko, erregulatzeko eta kudeatzeko sistemak, energia-kostuen kontagailuak eta banatzaileak, banaketa- eta garraio-sareak, etab.

7.8 Jarduketa eguzki plaka termikoak edo biomasaren aprobetxamendurako instalazioak ezartzea denean:

- Eraikinetako Instalazio Termikoen Erregelamenduak (1027/2007 Eraikinetako Instalazio Termikoen Erregelamendua) 1.2.4.6 Instrukzio Teknikoan ezarritako murrizketa gisa, non adierazten baita aire zabaleko igerilekuak bero berriztagarriaren edo hondar-beroaren ekarpenaren bidez berotuko direla, kanpoko igerilekuen bero-beharrak asetzeko eskariaren potentzia, proiektuaren arabera, ez da kontuan hartuko diru-laguntzaren kalkulua egiteko. Beraz, bero-eskariaren gehieneko potentzia kalkulatu kanpoko igerilekuetara bideratutako potentzia-ekarpena kontuan hartu gabe adierazi behar da.

## **8. artikulua. Onuradunak**

8.1 EITen ondoriozko obrak egiteko diru-laguntzaren onuradunak izateko aukera izango dute jarduketa proposatzen deneko higiezinaren jabetza horizontala duten eraikinetako Jabeen Komunitateek edo eraikinen jabeek.

Jabetza horizontaleko erregimenean dauden eraikinak badira, jabeen komunitateek haiek behar bezala ordezkatzeko dituenaren bidez jardungo dute.

8.2 Eraginkortasun energetikoa hobetzeko jarduketak gauzatzeko diru-laguntzaren onuradunak izateko aukera izango dute:

- 6.2 artikuluko a), b) eta c) ataletako jarduketan kasuan, soilik Jabeen Komunitateek, edo eraikinen jabeek.
- 6.2 artikuluko d), e) eta f) ataletako jarduketak etxebizitzetan egiten diren kasuetan, ohiko okupazioko etxebizitzaren jabe, gozamen-dun edo maizter diren pertsona fisikoak.
- 6.2 artikuluko d), e) eta f) ataletako jarduketak establezimendu komertzialean egiten diren kasuetan, lokalen legezko erabiltzaileak, pertsona fisikoak edo juridikoak direla, eta jabe nahiz errentari gisa jarduten dutela, edo erabilera-eskubideren bat dutela.

8.3 Ezin izango dira onuradun izan administrazio publikoak, horien erakunde autonomoak eta enpresa publikoak, ezta beste erakunde publiko batzuk ere.

8.4 Ezingo dira onuradun izan:

- Diru-laguntzetarako Lege Orokorraren (azaroaren 17ko 38/2003 Lege Orokorra) 13.2 eta 3 artikuluetan aurreikusitako kasuetako jarduketak.
- Foru Ogasunarekin eta Hernaniko Udalarekin zerga betebeharretan eguneratuta ez dagoena. Konprobazioa ofizioz egingo da. Horretarako baimena eman behar du eskatzaileak (eskaera orrian). Bestela, erakunde bakoitzaren ziurtagiria ekarri beharko du.

## ***9. artikulua. Beste diru laguntzekiko bateragarritasuna.***

Oinarri hauetan aurreikusitako diru-laguntzak bateragarriak izango dira helburu bererako edozein Administrazio edo erakunde publiko edo pribatu nazionaletik, Europar Batasunetik edo nazioartekoetatik etorritako beste edozein diru-laguntza, laguntza, sarrera edo baliabiderekin

Beste laguntza batzuekin elkartuz gero, guztien kopuruak ezin izango du diruz lagundutako jardueren kostu lagungarriaren %75 gainditu. Bestela, murriztu beharreko kopurua murriztuko da deialdi honen kargura emaniko diru-laguntza.

## III. KAPITULUA PROZEDURA

### ***10. artikulua. Diru-laguntzak emateko prozedura***

Oinarri hauetan aurreikusten diren diru-laguntzak norgehiagokako prozedura erraztuaren bidez tramitatuko dira, diru laguntzen izaera eta ezaugarriak kontuan hartuta, ezin delako denborazkoa ez den beste lehentasun-irizpiderik ezarri. Horregatik, epe barruan eskaerak aurkeztu ahala tramitatu eta ebatziko dira, betiere aurrekontu-kreditua dagoen bitartean.

Kreditua agortu dela Udal web orrian ([www.hernani.eus](http://www.hernani.eus)) jakinaraziko da.

### ***11. artikulua. Eskaerak aurkezteko epea eta modua***

Eskaerak aurkezteko epea: oinarriak eta deialdia Gipuzkoako Aldizkari Ofizialean argitaratzen diren egunaren hurrengoan hasiko da, eta 2021eko abenduaren 31 arte edo diru-laguntza emateko aurrekontua amaitzen den unera arte luzatuko da.

Diru-laguntza eskabide osoak aurkeztuta eta bideratzen egon arren, bazter egingo dira, baldin eta esleitutako aurrekontua agortzen bada, organo eskumendunak emango duen ebazpenaren bidez.

Nolanahi ere, aurrekontu ahalmenaren baitan, Hernaniko Udalak aurrekontua handitu dezake, baldintzak betetzen dituzten eskaera guztiak onartu ahal izateko. Horretarako, indarrean dagoen legeriaren arabera eta finantza-erabilgarritasuna kontuan hartuta, aurrekontu-aldaketa espedienteak tramitatu beharko da. Aurrekontu-kreditua handitzearen ondorioz laguntzen hasierako zuzkidura

handitzen bada ez da beharrezkoa izango deialdia berriro argitaratzea hura eraginkorra izateko. Halaber, beharrezkoa ikusten bada, 3. artikuluan ezarritako banaketa egokitu ahal izango da.

Esleitutako aurrekontua agortzen ez bada, aurrez adierazitako epea luzatu ahal izango da eskumendunak emango duen ebazpenaren bidez. Ebazpena udalaren web orrian eta Gipuzkoako Aldizkari Ofizialean argitaratuko da.

Laguntza hauek jaso nahi dituzten pertsonak, deialdian jasotakoari jarraiki, eskaera behar bezala beteta aurkeztuko dute. Eskaera-orria Hernaniko Udalaren HHZ-Herritarren Harrera Zerbitzuan eskuragarri izango dute, baita udal web-orrian ere. Eskabidea Udalaren erregistroan aurkeztuko ahal izango da.

## ***12. artikulua. Eskabideak: dokumentazioa***

Diru-laguntzak hauek jaso ahal izateko behean zehaztutako dokumentuak aurkeztu behar dituzte eskatzaileek.

### 12.1 Dokumentazio administratiboa

- Diru-laguntzarako eskabide normalizatua, betea eta sinatua
- Pertsona fisikoen kasuan:
  - Onuradunaren NAREN fotokopia
- Pertsona juridikoen kasuan:
  - Erakunde eskatzailearen edo jabekide elkargoaren IFZren fotokopia
  - Pertsona arduradunaren edo ordezkariaren NAREN fotokopia.
  - Enpresa/kolektiboa dagozkion erregistroetan izena emanda dagoela adierazten duen ziurtagiria
- Eskatzailearen kontu korrontearen titulartasuna egiaztatzen duen agiria
- Jasotako beste edozein diru-laguntzari buruzko dokumentazioa

### 12.2 Dokumentazio teknikoa

Jarduketa baloratzeko, eskatzaileak jarduketari buruzko informazio teknikoa aurkeztuko du. Eskatzaileak gutxieneko dokumentazioa osatu ahal izango du interesgarritzat jotzen duen beste edozeinekin. Nolanahi ere, Udalak beharrezko iritzitako behar adina informazio osagarri eskatu ahal izango die eskatzaileei.

Hau da gutxieneko dokumentazio teknikoa:

- Jardueraren osagai nagusien kolorezko argazkiak. Argazki horietan hasierako egoera eta jarduketaren ondorengoa islatuko dira.
- Egindako obraren edo instalazioaren faktura xehea(k) eta ordainketa frogagiria(k). Honako kontzeptu hauek jasoko dira gutxienez:
  - Onuradunaren izena eta, kasuan kasu, nortasun agiriaren zenbakia edo identifikazio fiskaleko zenbakia (IFZ). Fakturak onuradunaren izenean eginda egongo dira, oinarri arautzaile hauetan ezartzen dena kontuan hartuz.
  - Jarduketaren helbide zehatza
  - Lanen edo instalazioaren azalpen laburra



- Lanaren barnean jasotako partidak behar bezala banakatuak. Ez da onartuko partida ekonomiko agregatuak dituen eskaintzarik, deialdi honi dagokionez partida ekonomiko garrantzitsuak bereiztea eragozten badu.

Fakturak ez baditu adierazitako kontzeptu horiek jasotzen, harekin lotuta dagoen aurrekontua aurkeztu beharko da, eta aurrekontuan agertu egin beharko dute kontzeptu horiek, dagokion instalatzaileak sinatua eta zigilatua.

- Proiektua badago, horren idazketaren eta zuzendaritzaren faktura eta ordainketa frogagiriak.
- Jarduketaren arabera:
  - **EITaren ondoriozko obrak** (6.1 artikulua): EITa Udalean aurkeztu izanaren kopia.
  - Bizitegi erabilerako **eraikinaren ingurutzailerearen hobekuntza** (6.2.a artikulua):
    - Memoria tekniko laburtua, besteak beste, egindako jarduketaren deskribapena eta datu tekniko esanguratsuenak jasoko dituen, eta betiere 6. artikuluan ezarritako baldintzak betetzen direla egiaztatzeko aukera emango duena, teknikari eskudun batek sinatuta.
    - Eraikinaren energia-ziurtagiriak: jarduketaren aurreko egoeran eta laguntzaren xede den jarduketaren ondoren aurreikusitakoan, teknikari eskudun batek sinatuta.
  - Bizitegi erabilerako **eraikinean bero-sistema zentralizatua ezartzea** (6.2.b):
    - Memoria tekniko laburtua, besteak beste, egindako jarduketaren deskribapena eta datu tekniko esanguratsuenak jasoko dituen, eta betiere 6. artikuluan ezarritako baldintzak betetzen direla egiaztatzeko aukera emango duena. Instalaturako ekipa garrantzitsuenen marka, modelo eta ezaugarriak islatuko dira. Teknikari eskudun batek sinatua egongo da, edo instalatzaileak, hala badagokio.
    - Instalazioaren datu nagusiak, dagokion eredu beteta, instalatzaileak sinatua
    - Ekipamendu nagusiaren edo nagusien fabrikatzailearen zehaztapen teknikoak (fabrikatzaileak emandako dokumentazio teknikoaren kopia).
    - Proiektuaren azalaren edo lehen orriaren kopia sinatuta, instalazio termikoaren potentzia termikoa 70 kW-ekoa baino handiagoa bada.
  - Bizitegi erabilerako **eraikinean elkarbanatutako instalazio berriztagarriak ezartzea** (6.2.c):
    - Memoria tekniko laburtua, besteak beste, egindako jarduketaren deskribapena eta datu tekniko esanguratsuenak jasoko dituen, eta betiere 6. artikuluan ezarritako baldintzak betetzen direla egiaztatzeko aukera emango duena. Zehaztu beharko ditu, gutxienez, dimentsionamenduko datu nagusiak, instalaturako ekipa garrantzitsuenen marka, modelo eta ezaugarriak, eta baita aurreikusitako energia

konbentzionalaren aurrezkoa ere. Teknikari eskudun batek sinatua egongo da, edo instalatzaileak, hala badagokio

- Instalazioaren datu nagusiak, dagokion eredia beteta, instalatzaileak sinatua
  - Ekipamendu nagusiaren edo nagusien fabrikatzailearen zehaztapen teknikoak (fabrikatzaileak emandako dokumentazio teknikoaren kopia)
  - Argindarra ekoizteko instalazioak: sarera konektatutako Behe Tentsioko Instalazio Elektrikoaren Ziurtagiriaren kopia, edo abian jarri izanaren aktaren kopia, hala badagokio
  - Eguzki instalazio termikoa, 70 kW-tik gorako potentzia termikoa badu: proiektuaren azalaren edo lehen orriaren kopia sinatua.
- **Etxebizitzan edo establezimendu komertzialean kanpo-arotzeria beiraztatua berritzea (6.2.d):**
- Jarritako arotzeriaren memoria: jarritako arotzeria mota eta beira mota eta berritutako leihoetako bakoitzaren neurriak
  - Jarritako leihoen ezaugarriak egiaztatzeko dokumentazioa:
    - Erabilitako beiretako transmitantzia termikoaren entseguen (Ug) emaitzak
    - Isolamendu akustikoaren bereizgarria
    - Jarritako beirak justifikatzen dituzten eranskailuak
    - Jarritako leihoen EB marka egiaztatzen duten etiketak
- **Etxebizitzan edo establezimendu komertzialean galdara zaharrak ordezkatzeari (6.2 e):**
- Instalazioaren datu nagusiak, dagokion eredia beteta, instalatzaileak sinatua
  - Ekipamendu nagusiaren edo nagusien fabrikatzailearen zehaztapen teknikoak (fabrikatzaileak emandako dokumentazio teknikoaren kopia)
- **Etxebizitza edo establezimendu komertziala hornitzeko instalazio berriztagarriak ezartzea (6.2. f):**
- Memoria tekniko laburtua, besteak beste, egindako jarduketaren deskribapena eta datu tekniko esanguratsuenak jasoko dituen, eta betiere 6. artikuluan ezarritako baldintzak betetzen direla egiaztatzeko aukera emango duena. Zehaztu beharko ditu, gutxienez, dimentsionamenduko datu nagusiak, instalatutako ekipo garrantzitsuenen marka, modelo eta ezaugarriak, eta baita aurreikusitako energia konbentzionalaren aurrezkoa ere. Teknikari eskudun batek sinatua egongo da, edo instalatzaileak, hala badagokio.
  - Instalazioaren datu nagusiak, dagokion eredia beteta, instalatzaileak sinatua

- Ekipamendu nagusiaren edo nagusien fabrikatzailearen zehaztapen teknikoak (fabrikatzaileak emandako dokumentazio teknikoaren kopia)
- Argindarra ekoizteko instalazioak: sarera konektatutako Behe Tentsioko Instalazio Elektrikoaren Ziurtagiriaren kopia, edo abian jarri izanaren aktaren kopia, hala badagokio

### ***13. artikulua. Akatsak zuzentzea***

Eskabideak edo harekin batera aurkeztutako dokumentazioak akatsen bat baldin badu edo osatu gabe baldin badago, interesatuei hamar laneguneko epea emango zaie, jakinarazpena jaso eta hurrengo egunetik aurrera, antzemandako hutsak konpon ditzaten.

Emandako epea amaitu eta aurkitutako akatsak konpondu ezean, eskaera bertan behera utzi dutela iritziko da, prozedura artxibatuz, Administrazio Publikoen Prozedura Erkidea arautzen duen urriaren 1eko 39/2015 Legearen 68. artikuluan xedatutakoarekin bat ebazpena eman eta gero.

### ***14. artikulua. Bideratzea***

Espediente hauek tramitatzea eta diru-laguntzak ematea Hirigintza eta Ingurumen departamentuko Hirigintza atalaren ardura izango da. Aipatu Unitateak ofizioz egin ahal izango ditu ebazpen-proposamena burutzeko datuak ezagutu edota frogatzeko beharrezkotzat jotzen dituen jarduketa guztiak.

### ***15. artikulua. Ebazpena***

Ebazpena eman eta jakinarazteko gehienezko epea hiru hilabetekoa izango da, eskabidea egin denetik aurrera kontatzen hasita. Epe horren barnean ebazpenik eman ez bada, eskabidea baztertua izan dela ulertuko da, jarri ahal diren administrazio-helegiteei begira.

Eskaera aurkezteak ez du berez ematen diru-laguntza jasotzeko eskubidea, eta diru-laguntza orori dagokion hautazko izaera izango du kontzesio horrek ere.

Diru-laguntza ematea edo ez ematea erabakiko duen Alkate-Ebazpenak amaiera emango dio administrazio-bideari, eta haren aurka, nahi izanez gero, berraztertze errekurtsoa aurkez daiteke, administrazioarekiko auzi-errekurtsoaren aurretik, hilabete bateko epean, eman zuen organo beraren aurrean, edo bestela, Donostiako Administrazio-auzietarako Epaitegiaren aurrean zuzenean inpugnatu daiteke, honen berri ematen den hurrengo egunetik hasi eta bi hilabeteko epean.

### ***16. artikulua. Diru-laguntza ordaintzea***

Ordainketa bakarrean emango da diru-laguntza, ebazpenean finkatutako zenbateko guztia ordaindurik.

Diru-laguntzaren zenbatekoa, hura bakarrik hartuta edo beste Herri Administrazio batzuen edo beste Erakunde Publiko edo pribatu batzuen beste diru-laguntza edo laguntza batzuekin batuta, ez da, inola ere, onuradunak egindako instalazioaren edo jardueraren kostua baino handiagoa izango.

Jarduerak, diru-laguntzarekin ez ezik, funts propioekin edo beste diru-laguntza edo baliabide batzuekin finantzatu badira, funts horien zenbatekoa eta jatorria adieraziko dira eta diruz lagundutako jardueretarako erabili direla egiaztatu beharko da justifikazioan.

IV. KAPITULUA  
KONTROLA ETA PUBLIZITATEA

***17. artikulua. Diru-laguntzen publizitatea***

Diru-laguntzen publizitateari dagokionez, bete egingo da azaroaren 17ko 38/2003 Legearen 18. eta 20. artikuluek eta abenduaren 9ko 19/2013 Legearen 8. artikulua xedatutakoa.

***18. artikulua. Ikuskaritza eta kontrola***

Pertsona onuradunak behartuta egongo dira diru-laguntzen kudeaketa zuzena bermatzera bideratuko ziurtatze guztiak erraztera. Eta ezingo die uko egin diru laguntza eman duen organoak egin beharreko ziurtatze jarduketei.